



Gabinete Wever - Croes II



ISLA ONLINE

Noticia di Gobierno

2023

Diahuebs 10 Augustus 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



PROME MINISTER TA FELICITA Y GRADICI SR. RODERICH LOPEZ Y SU GRUPO MASSIVE BRASSBAND INT PA PONE ARUBA SU NOMBER RIBA TARIMA INTERNACIONAL



Durante e siman di Juli 28 pa Augustus 7, a tuma luga na Medellin, e famoso evento anual "Feria de las Flores", na unda a participa sr. Roderich Lopez cu su grupo di Massive Brassband Int. Despues cu na 2022, e grupo aki a pone Aruba su nomber riba tarima internacional, tocando den parada na Magic Kingdom na Orlando Florida, a bay Hulanda pa participa na zomer carnaval, awor a haya e oportunidad pa participa den e gran evento aki na Medellin. "Feria de las Flores" ta un evento cu a cuminsa na 1957 como algo chikito, pero awendia ta un di e festivalnan na Medellin, mas bishita pa turistanan.

Prome Minister Evelyn Wever-Croes a expresa di ta sumamente orguyoso di sr. Lopez cu su grupo Massive Brassband Int, cu na mas di un ocasion, a sa di pone Aruba su nomber briya internacionalmente. E orguyo cu nan ta carga di ta Arubiano, y ta expresa esaki den cada presentacion, ta di admira. Ta notabel cu tur participante di Massive Brassband Int tin un pasion y amor grandi pa loke ta e musica di Asambeho, y sa di uza esaki pa representa nan isla stima dignamente.

Durante nan bishita na Medellin, sr Lopez hunto cu sr. Hessen a ricibi di señora Silvana Andrea, cu ta secretaria di Minister di Cultura, un bunita reconocimiento pa nan presentacion impactante. Esaki sigur ta un orguyo grandi pa nan como representantenan di e grupo di Asambeho, pero tambe pa tur ciudadano di pais Aruba. E reconocimiento aki ta habri posibilidadnan entre Aruba y Colombia pa cu arte den su totalidad.

"Masha pabien na sr Roderich Lopez y su grupo di Asambeho, Massive Brassband Int. cu e bunita presentacion na Medellin. Aruba ta orguyoso di boso, y ta gradici boso pa promociona e dushi baranca aki na un manera diferente. Tur e logronan aki di sr Lopez y su grupo, ta musta nos, cu soñonan por bira realidad, si bo pone tur bo esfuerzo, pasion y dedicacion den nan. Esaki sigur ta loke sr. Lopez a haci pa logra e soño grandi di participa cu su banda na varios eventonan importante, rond mundo. E ta yenami di orguyo pa sa cu Aruba ta conta cu ciudadanonan di e caliber aki" Prome Minister a expresa.

Continuacion **POTRETNAN DI SR. RODERICK LOPEZ Y MASSIVE BRASSBAND....**





Xiomara Maduro
MINISTER

GOBIERNO A GRADICI JOSELIN CROES PA SU TRABOU HACI COMO MINISTER PLENIPOTENCIARIO NA WASHINGTON



Na residencia di Embahador di Reino Hulandes na Washington DC a tuma luga un ceremonia di despedida pa sra. Joselin Croes como Aruba su Minister Plenipotenciario, GevMin, na Washington DC. Embahador sr. Andre Haspels y su casa sra. Bernie Haspels-Grootenboer a organisa e bunita recepcion di despedida aki pa nos GevMin y pa e ocasion aki Gobierno di Aruba a wordo representa pa Minister Xiomara Maduro. Durante e recepcion e mandatario a hiba palabra den nomber di Gobierno di Aruba pa gradici sra. Joselin Croes pa e trabou haci pa representa Aruba dignamente na Washington DC desde aña 2018 pa 2023.

Den su discurso e mandatario a trece dilanti cu desde aña 2018, Sra. Croes a demostra di ta pro-activo den un forma extra ordinario y a logra hechonan remarcabel, semper poniendo Aruba riba mapa na Washington. 'E amor di Joselin pa Pais Aruba den tur locual e ta haci ta evidente, ya cu ela sa di pone tur su energia y esfuerso pa logronan grandi pa Aruba. Su dedicacion, asistencia excelente, profesionalismo y preparacion ta hechonan cu nos ta balora y aprecia,' asina Minister Xiomara Maduro a expresa den su discurso.

Riba e tereno di Educacion, Sra. Joselin Croes a traha incansablemente pa logra un cantidad di acuerdonan (MoU's) y asina habri porta pa nos studiantenan na varios instituto



educativo na Merca. Cu su esfuersonan a logra pa studiantenan di Aruba por haya e beneficio igual na studiantenan Americano di por paga 'in-state tuition' enbes di tarifanan internacional. Esaki a haci studiamiento pa hopi di nos studiantenan di Aruba un soño alcansabel. Danki na su esfuerso Pais Aruba ta riba e lista di 'Latin American and Caribbean Scholarship' na estado di Florida. Un logro grandi considerando cu studia na Merca ta hopi costoso.

Sra. Croes a hunga un papel importante tambe den e evaluacion di Trafico di Persona. Danki na Joselin su gran esfuerso, Aruba a ricibi un evaluacion positivo y nos a 'upgrade' nos nivel, lo cual ta refleha nos compromiso pa cumpli cu exigencianan internacional.

Minister Maduro a trece dilanti cu como Minister di Finansa e tabata testigo di e bon contactonan cu Sra. Croes tin na cu IMF y Banco Mundial. Su asistencia pa organisa e reunionnan cu un coordinacion impecabel tabata di sumo balor pa e exito di Aruba.

Pa locual ta area diplomatico, Sra. Joselin Croes a asisti Prome Minister Evelyn Wever-Croes na e Asamblea General di Nacionnan Uni. Su planificacion den detaye y su boluntad pa haci esfuersonan adicional tabata bisto pa asina garantiza cu e agenda druk di MinPres a cana bon sin ningun problema.

Continuacion GOBIERNO A GRADICI JOSELIN CROES PA SU TRABOU HACI....

Ademas Sra. Joselin a desempeña un papel fundamental durante e negociacionnan pa locual ta 'Preclearance Treatment' di US Customs and Border Protection na Aruba. Su perseverancia a resulta den negociacion exitoso cual ta hopi significativo pa nos Pais.

E logronan menciona ta djies algun ehempel di Sra. Joselin Croes su trabou den e ultimo 5 añanan. Tin hopi mas trabou cu a wordo haci y su impacto a haci Aruba renombra na Washington. Na final di e discurso Minister Maduro a presenta Sra. Joselin cu un recuerdo como muestra di gratitud y aprecio pa semper representa nos Pais cu dignidad y dedicacion. 'Tur final tin un comienso nobo y pesey nos ta desea Sra. Joselin Croes tur exito y felicidad pa futuro,' tabata palabranan di Minister Maduro na final di e discurso pa yama Sra. Joselin Croes danki pa e trabou haci como Aruba su GevMin na Washington.





COORDINADO DI STAGE DI COLEGIO EPI SRA. EDDelyn DIJKHOFF TA DESEA E STUDIANTENAN CU TA BAY EHERCE NAN PASANTIA NA MEXICO HOPI EXITO



Diamars ultimo, seis (6) estudiante di Sector Ciencia y Tecnologia a biaha pa eherce nan pasantia na Iberostar Playa Paraiso na Riviera Maya, Mexico. Proximamente tres (3) estudiante mas di Sector Hospitalidad y Turismo lo ta biahando. Coordinado di pasantia di Colegio EPI Sra. Eddelyn Dijkhoff a expresa cu pasantia ta importante pa un “beroepsopleiding” y enseñansa ta importante pa e progreso di Aruba.

Sra. Dijkhoff ta gradici Gobierno di Aruba y Iberostar pa e iniciativa aki y ta desea Charity Yarzagaray di “Civil Engineering”, Joshua Folkes di “Electrical Engineering”, Mishalska Maduro di “Civil Engineering”, Ovitson Britus, Mitchell Wernet y Samuel Betrain di “Mechanical Engineering” hopi exito. Ademas di esaki, Sra. Dijkhoff a gradici e team di Colegio EPI cu a traha duro pa realisa esaki. E studiantenan ta sumamente contento pa e gran oportunidad aki cu nan a haya y ta entusiasma pa tur locual nan ta bay siña durante nan pasantia na Mexico.



MINISTER ENDY CROES TA FELICITA NOS CICLISTA KAILEN WOUTERS CU A KEDA NA DI DOS LUGA DEN BMX WORLD CHAMPIONSHIP NA SCHOTLAND

Diaranson ultimo, Minister di Enseñansa y Deporte Endy Croes a ricibi e ciclista Kailen Wouters na Aeropuerto Internacional Reina Beatrix. Den un ambiente festivo Kailen Wouters a wordo ricibi na su yegada na Aruba. E sorpresa pa Kailen tabata ora cu e musica di Asambeho a cuminsa resona pa dun'e bonbini na su regreso. Kailen a participa den BMX World Championship cu a tuma lugha na Glasgow, Schotland, dia 6 pa 13 di augustus 2023. E ciclista di solamente 9 aña di edad cu a competi contra e 89 miho coredonan rond di mundo y a logra sali di dos lugha.

Kailen tabatin un entrenamiento hopi intensivo cu varios luna di preparacion. Sr. Gregory Wouters, kende ta e coach y tata di e deportista a hiba Kailen den exterior algun luna pa practica cu un team di profesional. Famia, Amistad y tur su compañeronan di e team di BMX tabata presente na aeropuerto pa felicita Kailen cu e gran logro aki. Minister Endy Croes ta felicita Kailen Wouters cu a finalisa na di dos lugha den e BMX World Championship y ta felicita su coach y tata Gregory Wouter cu e triunfo aki. Cu deseo, disciplina, determinacion y dedicacion ta logra. Aruba ta orguyoso di bo Kailen!





MINISTER GLENBERT CROES A ATENDE E CONFERENCIA ORGANISA PA HIAS ARUBA

"E meta di Gobierno ta, pa yuda na un manera responsabel, tur esnan cu ta di bon voluntad, y cu kier traha y yuda hiba nos pais padilanti"

Diaranson mainta na Hyatt Place a tuma luga un conferencia organisa pa HIAS Aruba. E conferencia aki titula "unlocking opportunities", a enfoca riba habri oportunidadnan laboral pa imigrantenan cu ta na Aruba. Minister di Integracion Glenbert Croes tabata presente, y a trece dilanti kico e maneho nobo di Gobierno ta pa cu e imigrantenan actualmente. Durante e conferencia, a intercambia ideanan cu otro departamentonan di Gobierno presente, pa mira kico ta e posibilidadnan pa integra e imigrantenan cu ta na Aruba caba, den e mercado laboral. Minister Croes a indica cu pa Aruba por yuda e imigrantenan aki, nan mester a drenta Aruba legalmente y no tin niun antecedente penal.

E meta di Gobierno ta, pa yuda na un manera responsabel, tur esnan cu ta di bon voluntad, y cu kier traha y yuda hiba e pais padilanti. Unabes cu e imigrantenan aki wordo integra legalmente den e mercado laboral, nan lo contribui na progreso di pais Aruba, pagando impuesto, na fondo di pension, na AZV, y na caha di gobierno. E oportunidad pa por yuda e imigrantenan aki ta grandi, mirando cu tin varios construccion di hotel andando. E enfoke lo ta mas riba nos hendenan local, na unda nan lo tin e prome opcion pa bin na remarke pa trabou, pero sigur tur e desaroyo aki lo habri oportunidad pa por yuda e imigrantenan cu ya ta na Aruba.


Minister Croes a indica cu e proceso pa trabou lo cana na un manera responsabel. Tur e imigrantenan cu ta bin na remarke pa trabou na Aruba, lo wordo scrutina pa loke ta salud y antecedentenan penal. Cu esaki, Gobierno ta percura cu esnan cu ta wordo duna permiso pa traha, ta hendenan di bon voluntad, y cu bon intencion pa traha y hiba nos pais dilanti.

"Manera Libertador Betico Croes semper a bisa; "Arubiano no ta solamente esun cu a nace na Aruba, sino esnan cu a bin di nan pais di origen, cu ta stima Aruba, cu ta contribui na e economia, y cu a forma un famia akinan". Cu e sentimento aki, Gobierno ta trahando riba e maneho di integracion pa asina yuda integra e imigrantenan na Aruba den e mercado laboral" Minister Croes a expresa.



Total invoerrechten & BBO	Afl.	0.13
--------------------------------------	-------------	-------------

Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! _____